



**CON PA CURA
E HERIDA DI
RECHASO**



WWW.SOLODIPUEBLO.COM



SOLODIPUEBLO@GMAIL.COM

**POLIS DI K9 A DETENE
SOSPECHOSO BUSCA PA
JUSTICIA RELACIONA CU UN
INVESTIGACION DI UN CASO PA
RECHERCHE SANTA CRUZ**



**DESPUES DI UN TEMPO TA VIGILA
E CAS, E TEAM DI NARCOTICA DI
POLIS A HACI ENTRADA JUDICIAL
Y DETENE UN SOSPECHOSO**



**PILOTO DI AVION A NENGA MUHE
BAO INFLUENCIA DI UN OF OTRO
SUBSTANCIA Y AGRESIVO
ABORDA AVION**



**POLIS TA SIGUI CU NAN CONTROL DEN TRAFICO VARIOS
BOET A SER REPARTI NA PIEDRA PLAT**

**SINTONISA PROGRAMA EN CONEXION
CU INTRODUCCION DI PAPIAMENTO
DEN KLAS 1 DI SCOL BASICO
DIALUNA, 15 DI JULI**



TeleAruba y Canal 22 lo ta en bibo desde 9 or di anochi

CHAUFFEUR HIBANDO 2 DAMA SANICOLAS A ACCIDENTA CU AUTO DI COMPANIA Y A BAY LAGA E 2 DAMANAN HERIDA ATRAS



Diasabra madrugada drenta informe di un accidente

cu hende herida riba e caminda di Mondri Fierno pa Balashi, mesora a dirigi tanto polis como ambulans na e sitio.

Na caminda pa e sitio a compronde cu e chauffeur a baha e 2 damanan herida na e sitio di accidente y a sigui bay cu e auto. Na yegada di e patrulla a bin compronde cu aki ta trata di un accidente unda cu e chauffeur di e Van blanco a bay kita pa un cachu y a perde control y a bay dal un palo di lus kibra. Den e auto e chauffeur tabata hibando 2 dama pa Sanicolas cual ambos a resulta herida un mas cu e otro. E chauffeur a baha e damanan herida y a sigui bay cu e van. Mucho mas leu e no por a yega debi na daño na e auto y a purba bay sconde e vehiculo. Na yegada di e ambulans nan a atende e damanan y a hiba un di nan pa hospital. Mientras e otro a ser busca pa su dueño di trabao. Polis cu a sera e caminda banda



pazuid a nota un van manera poco scondi na un hanchi tera bay pabao y a bay wak. A bin resulta cu esey ta e van cu a dal e palo di lus. Un rato despues ta aparece un hende eyan cu ta bisa cu e tambe tabata den e auto y cu ela yuda e chauffeur pa hala e auto for di caminda ya cu tin

hopi auto ta pasa y e van tabata riba caminda pero e mes (supuestamente) ta rondando e chauffeur cu ta desapareci. Mirando cu e chauffeur no tey polis a confisca e auto. ELMARNV a presenta pa drecha e palo di lus kibra.

DESPUES DI UN TEMPO TA VIGILA E CAS, E TEAM DI NARCOTICA DI POLIS A HACI ENTRADA JUDICIAL Y DETENE UN SOSPECHOSO

Diabierna den oranan di mainta oficialnan di e team di narcotica di polis a presenta na caya Soeur Desideria pa asina detene y confisca evidencianan necesario pa asina pone e sospechoso pa responsabel di su envolvimento den un caso di traficante di droga.

Polisnan a bay hunto cu oficialnan di ministerio publico pa inmediatamente facilita e permiso y ordo necesario.



TRAILER A LOS FOR DI E VAN CU TABATA LASTRE Y E CADENA CU TA WANTE A PONE ESAK DAL SU TRAS

Diabierna madruga a drenta informe di un incidente riba e caminda di rotonde banda di Superfood pa rotonde Eagle Beach, mesora a dirigi un patruya na e sitio. Na yegada di e patruya a bin compronde cu e trailer tras di un van a los for di e bol pero e cadena a bons bin dal bek na e van. Afortunadamente ningun hende a resulta herida. Pero e van si a haya daño limita.



POLIS DI K9 A DETENE SOSPECHOSO BUSCA PA JUSTICIA RELACIONA CU UN INVESTIGACION DI UN CASO PA RECHERCHE SANTA CRUZ

Diabierna merdia unidad di polis K9 hunto cu recherchenan di distrito 4 (Santa Cruz) a presenta na Bubali pa asina logra captura un sospechoso busca relaciona cu un investigacion cu e oficialnan di recherche ta investigando. Nan a detene y mesora a traslade pa warda di Santa Cruz.



CHAUFFEUR NO A REGULA SU VELOCIDAD NI A MANTENE DISTANCIA A BAY DAL TRAS DI UN AUTO NA SANTA CRUZ



Diabierna merdia a drenta informe di un accidente na Santa Cruz, mesora a dirigi un patruya na e sitio. Na yegada di e patruya a bin compronde cu aki ta trata di un accidente unda un chauffeur pa un of otro motibo

no a regula su velocidad ni a mantene distancia a bay dal tras di un auto. Afortunadamente ningun hende a resulta herida.

UTV CORIENDO DEN FORMA PELIGROSO NA COSTA PANORT A PERDE CONTROL BAY DAL RIBA AUTO DI FAMILIA



Diabierna atardi a drenta informe di un accidente na e costa panort di Aruba, mesora a dirigi un patruya na e sitio. Na yegada di e patruya a bin compronde cu aki ta trata di un accidente unda un turista coriendo cu un UTV den forma peligroso y lo a perde control y a bay dal den auto familia. Ta trata aki den un grupo den tour di utv cu a accidenta. Den e caso aki e tour guide patras a laga turistanan sigui cu utv mientras esun a keda patras wardando riba polis. Polis avisa e turista pa e bolbe bek na e sitio di e suseso asina pa polis tuma datos. Afortunadamente ningun hende a resulta herida.


Clasificados

SOLODIPUEBLO@GMAIL.COM
CEL. 585 9500

SOLO Di Pueblo

PILOTO DI AVION A NENGA MUHE BAO INFLUENCIA DI UN OF OTRO SUBSTANCIA Y AGRESIVO ABORDA AVION

Diasabra atardi a surgi un situacion na airport unda un muhe bao influencia di un of otro substancia y hopi agresivo kier a aborda e avion pa bay merca. Pa ley pilotonan no mag transporta hendenan arma, bao influencia of peligroso den vuelonan. Polis mesora mester a drenta accion detene e un muher cu ta bao influencia di un of otro substancia y tabata tin malcomportacion y agresivo riba dje. Polis a detene y a bay warda di polis cun'e y ela perde su vuelo di awe pasando un anochi den cel na warda di polis.



POLIS A DETENE DAMA TURISTA CU A BRINGA CU SU CASA DEN CAMBER DI HOTEL YA CU E NO KIER A TENDE

Diasabra madrug a drenta informe di un pelea den camber di un hotel na Palm Beach, mesora a dirigi un patruya na e sitio. Na yegada di e patruya a bin compronde cu aki ta trata di un dama turista hopi agresivo cu a bringa cu su casa den camber. Esnan di e hotel a ofrece un otro camber pero e no tabata kier a tende ni cu nan a pidi un taxi pa e bay pasa anochi na otro hotel y e dama a keda cu su agresividad. Ora polis a pidi e vehiculo



di transporte y e dama a mira e vehiculo e ora ey numa e dama a cambia su actitud pero ya tabata laat

y a detene y hib'e pa warda di polis unda eyan e lo pasa e anochi.



Compronde loke bo ta skirbi y lesa

Sintonisa

PROGRAMA INFORMATIVO

▼  **15 di juli 2024**

 **9:15 PM**



 /ManehoDiIdiomaAruba

Ministerio di Enseñansa y Deporte

ONE HAPPY ISLAND LIONS CLUB A BISHITA CAS PARAISO.



na nos club pero vooral na tur e habitantenan di Cas Paraiso.

Tur habitante tambe a ricibi un dushi snackbox, coy bebe saludable y refrescante y un dushi jello dessert.

Grupo di baile Dabaruida a duna un tremendo show di baile y trece tur hende den dushi ambiente.

Un danki mashi grandi na Aruba Aloe Balm cu a haci donacion di hand y body lotions pa tur habitante di Cas Paraiso. Un gesto masha aprecia door di nos grandinan.

Danki na pueblo di Aruba cu ta bin ta cooperando na tur evento di recaudacion di fondo di nos club cu ta haci, cu nos por sigui duna servicio boluntario na nos comunidad.



Recientemente miembronan di One Happy Island Lions Club a bishita Cas pa nos grandinan, Cas Paraiso na Catashi, Santa Cruz. Nos a wordo acompaña pa Friends of Lions, Magaly,

Eddy y Solange cu a yuda duna mayoria di e 30 grandinan un massage di man. Tambe algun a ricibi un corte de cabey for di voluntario y friends of Lions Sra. Petra Garcia. Danki pa e apoyo brinda

Maneho di Idioma:

SINTONISA PROGRAMA EN CONEXION CU

INTRODUCCION DI PAPIAMENTO DEN KLAS 1 DI SCOL

BASICO DIALUNA, 15 DI JULI

TeleAruba y Canal 22 lo ta en bibo desde 9 or di anochi

Manera ta conoci, entrante aña escolar 2024-2025, e alumnonan di klas 1 di scol basico lo siña lesa y skirbi na Papiamento. Lo duna Hulandes cu un acercamento nobo cu ta pas mas den e contexto di nos muchanan. E ta cientificamente proba cu si e muchanan forma un base fuerte den nan propio idioma, nan por siña e otro idioma hopi mas facil y miho. Ademá, siña lesa y skirbi den idioma materno

Papiamento lo haci cu e muchanan lo comprende loke nan ta skirbi y lesa y lo stimula nan habilidadnan di siña en general. Esaki lo ta beneficioso pa e muchanan, mirando cu nan lo bira critico di pensamiento y lo ta mas prepara pa duna nan opinion durante les. Ademá di esaki, nan por conecta miho cu nan rais cultural. E muchanan lo sinti mas sigur den nan proceso di siñamento,



pasobra esaki ta alinia cu nan idioma materno y nan cultura. Pueblo di Aruba ta cordialmente invita pa sintonisa programa en conexion cu introduccion di Papiamento den klas 1 di scol basico a traves di TeleAruba y Canal 22, cuminsando 9 or di anochi.

POLIS TA SIGUI CU

NAN CONTROL DEN

TRAFICO VARIOS

BOET A SER REPARTI

NA PIEDRA PLAT



Diabierna merdia polis a tene un control den trafico banda di Bright Bakery na Piedra Plat, esaki den cuadro pa un trafico mas sigur pa un y tur riba caminda. Durante e control aki varios boet a ser reparti pa varios infraccionnan cometi den trafico. Percura pa bo documentonan semper ta na ordo pa asina bo evita gastonan innecesario.



We are
looking for...

The Marketing Unit is responsible for developing and executing all marketing, branding, and communications strategies, policies, and plans for the A.T.A. and the Aruba brand as well as executing all marketing-related activities.

Branding & Niche Manager

The Branding & Niche Manager is co-responsible for the research and analysis of branding-related activities, the development of branding strategies and policies, providing branding advice, exploitation of the Aruba brand, the development of the niche marketing strategy and niche plans as well as the management of the branding & niche unit.

Interested and eligible candidates can submit their application and motivation letter via our Career Portal.

The deadline for applications is August 2, 2024.



SCAN ME!
And visit our Career Portal for more information about the positions and requirements.

Minister Endy Croes: WOMEN'S CLUB OF ARUBA A OTORGA BEST STUDENT AWARD NA E MIHO GRADUADONAN DI AÑA 2024 A reconoce e 23 miho graduadonan di Aruba



Diahuebs ultimo, Best Student Award Event organisa pa Women's Club of Aruba a tuma lugá na Renaissance Convention Center. Su Excelencia Gobernador di Aruba Sr. Alfonso Boekhoudt y distinguida esposa Sra. Hanneke Boekhoudt-Koetse hunto cu Minister di Enseñansa y Deporte Endy Croes acompaña pa su distinguida esposa Sra. Dilailah Croes, famia, y amigonan tabata presente den e ocasion special aki. A inicia e ceremonia oficial cu entrada oficial

di e 23 miho graduadonan, sigui pa discurso di Sra. Michella Steenvoorde-Lacle, kende ta e trekker di Women's Club of Aruba. Durante e anochi ameno aki, Minister Endy Croes a dirigi palabra na e miho graduadonan di aña 2024. Ademas di esaki, miho graduado di aña 2002 Sr. Nigel Wix, a duna un discurso inspirativo.

Desde aña 1940, Women's Club of Aruba a inicia otorga premio na e miho graduadonan di Aruba. Esaki ta un momento

special, unda ta reconoce nan esfuerso, dedicacion y disciplina durante nan estudio. A reconoce e miho graduado di entre otro, Vwo, Havo, Educampus, Ibero American High School, International School of Aruba (ISA), Mavo di 7 vak, Mavo di 6 vak, Sector Economia di Colegio EPI, Sector Ciencia y Tecnologia di Colegio EPI, Sector di Salubridad & Servicio di Colegio EPI, Sector di Hospitalidad & Turismo di Colegio EPI, E.P.B. Doorstroom, Uitstroom, Arbeidsmarkt

y ABO 2, SPO, Avondhavo, Avondmavo di 7 vak y Avondmavo di 6 vak.

E hoben cantante y compositor Isdell Hyacinme, kende ta ganado di Arte di Palabra 2024 den e categoria di rap, a deleita tur presente cu su tremendo cancion. Finalmente, Minister Endy

Croes ta gradici presidente Sra. Reina Geerman, trekker Sra. Michella Steenvoorde-Lacle y henter e team di Women's Club of Aruba pa e gran trabou cu nan ta haciendo. Alabes, ta felicita e 23 e miho graduadonan di aña 2024 y ta desea nan hopi exito den e siguiente estapa.


MINISTER MADURO DI CULTURA A BISHITA MUSEO TULA NA CORSO



Siman pasa Minister Maduro di Cultura tabata di bishita na Corsou pa representa Consejo di Minister na e celebracion di Dia di Bandera di Corsou y a haci uzo di e oportunidad pa bishita algun museo, entre nan, Museo di Tula situa na Landhuis Kenepa conoci tambe como Plantage Knip.



Na Museo Tula e mandatario a wordo ricibi pa e historiador sra. Jeanne Henriquez cu a haci un recorrido y conta Minister Maduro e storia di Tula su lucha, resiliencia y e proceso encamina pa emancipacion cu a tuma lugha bou su liderazgo na Corsou. Den e museo sin muraya manera Museo Tula ta wordo yama, por haya un bista di e personahenan importante na Africa, den Caribe y na tera firme cu a sirbi di inspiracion pa e lucha cu Tula a hiba pa un bida den libertad. Tambe tin hopi obra di arte inspira pa e lucha di emancipacion cu a tuma lugha den nos region na mesun momento cu Tula



tabata bataya na Corsou. Un seccion den e museo ta corda nos riba e rol di e hende muhe den e lucha pa emancipacion. Fo'i di un bentana di e museo por aprecia e ceronan na unda Tula y su compatriotanan a hiba nan lucha, y e biento cu ta supla ta corda nos cu e lucha pa libertad tabata un fuerte y cu tempo no por laga nos lubida.

Minister Maduro ta gradici sra. Jeanne Henriquez pa e oportunidad pa conoce mas di cerca e lucha di Tula, y ta desea cu den un futuro cercano e museonan di Aruba y Corsou por tin un bon cooperacion cu otro pa asina sin muraya nos por conoce e storia di emancipacion y libertad di nos Pueblonan.

POLIS A BAY BANDA DI EDIFICIO DI CORTE PA UN AUTO SOSPECHOSO

Diabierna madruga a drenta informe di cu tin un auto sospechoso para banda di edificio di Corte, mesora a dirigi un patrulla na e sitio. Na yegada di patrulla a bin encontra cu Hyundai Accent A22694 tur destrui. Comp cu e number no ta cuadra cu e auto polis a confisca e vehiculo aki pa mas investigacion.



Dennerich Kelly:

Mester caba cu tur otro desigualdad awor cu Hulanda a impone riba nos norma y balornan



Hoben politico di AVP Dennerich Kelly tabata na Den Haag den Hoge Raad ora e sentencia a cay pa forsa Aruba habri matrimonio entre pareha di mesun sexo. Segun Kelly ta momento pa nos bolbe sinta reflexiona kico esaki kiermen pa nos comunidad. “E lucha di un grupo den comunidad cu ta sinti nan mes discrimina y banda di esaki despues cu pueblo por a wak cu den parlamento, e politiconan no a logra yega na un decision pa regla cierto aspectonan cu e grupo aki tabata bogando p’e” asina Dennerich Kelly a expresa su desapunto rib’e tema aki. Kelly ta di opinion cu e situacion no mester a yega asina leu y cu mester a busca un forma mas madura y menos hostil pa regla e derechonan cu tabata falta den nos mes cas, esta parlamento asina respetando

Fe y creencia religioso di un gran mayoria di nos isla. “Nos ta boga pa ta baas den nos mes cas y pa falta di madurez politico, awe nos ta haya cu Hoge Raad, kende no ta escogi pa representa nos pueblo, awo ta dicidi pa nos.” e hoben politico a subraya catalogando e arrest di Hoge Raad como un “gemiste kans”

“E ta haya cu a yega ora pa Reino Hulandes combati tur desigualdad cu ta existi den Reino, awor t’e momento pa un era di hoben politico boga pa elimina desigualdad den enseñansa, cuido medico y caba cu pobreza riba nos islanan. Na final tur ciudadno den Reino Hulandes merece mesun calidad di bida sin importa unda nan ta biba den reino. “Tin un linea hopi fini pa encamina ora ta trato caso pa cu topico controversial asina aki y berdad bo por sinti cu bo ta discrimina, y esaki ta di compronde. Pero e ta keda unabes mas n’e representantenan di pueblo pa yega na otro y bin cu un solucion den cas” Kelly cu ta futuro candidato riba lista di AVP a vocifera dilanti Hoge Raad na Den Haag.

Segun Dennerich Kelly e matrimonio entre homber y muher ta un principio pa un comunidad nace y sobrevivir cual ta institui ya

desde comienso di mundo crea door di Dios. For di un matrimonio ta nace un famia cual t’e fundeshi di bida y educacion pa un comunidad duradero. No ta descarta cu persona nan den e comunidad, tur lo ta mescos y cu tur lo tin e mesun preferencia sexual. Na e momento ey bo ta haya un kiebri di comportacion humano cu lo mester contribui na mantene e comunidad y tambe humanidad su existencia. E kiebri aki no mester uz’e pa bringa otro

pero hustamente por uz’e aspecto pa respeta y trata otro na bon forma pa yuda otro. Esey lo bin di amor, un amor fundamental cu nos cada un tin den nos inculca door di nos mayonan y basa rib’e mandamento di Dios: Stima bo prohimo manera bo mes.

Dennerich Kelly ta un hoben politico cu pronto lo subi lista di Partido di Pueblo Arubano (AVP). E ta un professional den cuido medico, gradua na Hu-

landa den enfermeria. Cu algo mas di un decada den experiencia a labora na entre otro dr. Horacio Oduber Hospital, ImSan y actualmente como Praktijkondersteuner Huisartsenzorg (POH), Dennerich a sinti e yamada pa trece un cambio den politica na Aruba. E ta sinti cu nos generacion ta biba den un era transcendental unda no por djis para wak pero tin cu actua awo pa sigura un miho futuro y provenir p’e generacionnan siguiente.

Maravillas de la Fe

Bo ta sufri di un malesa nan cu no no por cura ? Manera artrosis, Alzheimer, demencia, depresión, diabetes osteoporosis, párkinson, insomnio, dolor di barica, weso migren dolo di barica, dolo di wesu, lomba, ect? Bo ta bebe remedi i bo no ta cura? Bo ta victima di bruheria? comunica na MARAVILLAS DE LA FE na 748 56 71

Bo no tin suerte? bo placa no ta jega? Bo ta cumpra number i bo no ta gana? Bo ta bai casino i perde tur bo placa? Invidia, mala suerte? comunika na 748 56 71

Bo tin problema di amor? Bo pareha ta gaña bo? Fracaso, soledad, angustia. comunika na

Comunica na 748 56 71



748 56 71



Chauffeur no a pone atencion ni a regula su velocidad ni mantene distancia a bay dal tras di auto



Diahuebs atardi a drenta informe di un accidente na Caya G.F. "Betico" Croes,

mesora a dirigi un patruya na e sitio. Na yegada di e patruya a bin compronde cu

aki ta trata di un accidente di cadena unda e chauffeur di un Nissan

March pa un of otro motibo no a regula su velocidad ni a mantene distancia a bay

dal tras di un Haval. Afortunadamente ningun hende a resulta herida.

FORTALEZA PA FAMILIA

Scirbi pa Pastor Marcel Balootje.

CRISTO HESUS TA E VENCEDOR

Pesey tambe Dios a hals'E te na halturanan, y a dun'E e nomber riba tur nomber, cu pa e nomber di Hesus tur rudia mester dobla, di esnan cu ta den cielo, y riba tera, y bao di tera, y cu tur lenga mester confesa cu Hesus Cristo ta Señor pa e Gloria di Dios Tata. (Filipensenan 2:9-10-11).

Esaki ta locual Dios Tata Todopoderoso a haci pa indentifica su Yiu Hesus Cristo como Rey di Reynan y Señor di Señornan. Den esaki Cristo Hesus a wordo proclama como e Vencedor, como e Ganador, tanto na tera como na cielo, y cu no tin ningun mas cu Cristo Hesus.

Pasobra tur locual ta naci di Dios a vence mundo, y esaki ta e victoria cu a vence mundo, nos fe. Y ta ken ta esun cu a vence mundo, si no ta esun cu ta kere cu Hesus, ta e Yiu di Dios.

Juan 14:6 Hesus a bise: Ami ta e caminda y e berdad, y e bida, ni un hende no ta bin serca e Tata, sino ta pa medio di Mi.

Di kico ta bal un hende gana tur cos cu tin na mundo y perde su alma, pasobra hopi cos cu hende ta antoha pe ta cosnan temporal, cosnan cu ta simplemente, terenal, natural, diabolico, caminda envidia, orguyo, y egoismo ta broma, cosnan cu ta hiba hende na nan propio destruccion y nos tur sa cu e cosnan ey no ta drenta den presencia di Dios, te pa nan yega na hereda e reino di Dios.

Spiertamento di Dios y horea duro di hende for di principio di mundo, tabata e piedra di tropica, Dios a papia cu Adam cu Eva pero nan a laga e diabel gañan y asina cay den pica y perde locual nan tabatin den paraiso.

Awor Dios ta spiertando e mundo atrobe pa medio di Juan 3:16 cual ta bisa bon cla cu esun cu kere den e Yiu unigenito di Dios cual ta nos Señor Cristo Hesus lo no bay perdi ma tin bida eterna.

Den Galationan 5:19-21, Pablo ta splica bon cla pa medio di e Palabra di Dios, cu esnan cu ta practica e obranan di Carni lo no hereda e reino di Dios.

Dios ta bolbe spiarta nos un biaha mas den 1 Corintionan 6:9-10-11 cu e inhustonan lo no hereda e reino di Dios, pero mescos e palabra ta muestra nos claramente cu esnan cu arepenti ta wordo Laba, Santifica, y Hustifica den e nomber di Señor Hesus Cristo y den e Spirito di nos Dios.

Den Romanonan 1 :18-32 Dios ta muestra claramente cu tur esnan cu cambia su Berdad pa Mentira, lo tin



cu carga e consecuencia, pasobra Dios no ta tolera esey, y lo entrega nan na pasionnan bergonsoso.

Pero tambe ta conoci cu e diabel ta busca hende cu kier reta Dios mescos cu e a seduci Adam y Eva, y e a seduci un tercera parti di angel nan den cielo pa nan bay contra Dios, y awendia tin hopi hende cu ta ninga di wak e consecuencia fatal y ta bay tras di nan orguyo, den cual Dios ta avisa tambe cu orguyo ta bini prome cu caida.

Ta tempo pa tur hende realisa cu tur esnan cu ta opone Dios ta cana riba e caminda di propio destruccion, pasobra nan lo ricibi castigo mereci pa nan eror.

Romanonan 2:5 palabra di Dios ta bisa; Ma pa motibo di bo capricho y bo curason cu no ta arepenti bo ta montona Furia di Dios pa bo mes.

Cristo Hesus ta e Ganador.

Sinceramente, Pastor Marcel Balootje.

Con pa cura e herida di rechaso

Rechaso ta algo cu nos tur mester trata cu ne na un momento den nos bida. No semper amor lo ser corespondi, y, laga nos ta honesto, casi tur relacion tin un punto y un fin. Si bo ta pasando den un situacion asina, nos a prepara algun consejo pa cura e herida di rechaso cu lo yuda bo hopi.

Superando un rechaso amoroso ta rekeri tempo y compromiso. Ta normal cu awor bo tin hopi sentimiento negativo, y compronde esaki ta parti di e proceso. Nos ta priminti bo cu si bo refleha riba nos pasonan pa cura e herida di rechaso bo por recupera di dje y lanta bo bista riba loke ta warda bo den futuro.

7 paso pa cura e herida di rechaso

Un articulo publica den Dialogues in Clinical Neuroscience na 2015 a examina e emocionnan cu ta produci despues di e rechaso. El a haya cu hende ta desaroya sentimento di jaloezie, soledad, nostalgia, culpa, berguensa, ansiedad social, tristesa i rabia.

Otro investigacion publica den Science na 2003 a calcula cu e dolor cu rechaso ta causa ta similar na dolor fisico. Esaki si nos considera e reaccion cu e cerebro ta produci pa cu esaki. Cu tur esaki nos ke bisa bo cu loke bo ta sinti awe ta perfecto natural y cu no ta pasobra bo ta exagerando e transcendencia di e episodio.

Pa e reflexionnan cu nos lo duna riba con pa cura e herida di rechaso nos a tene cuenta cu un contexto amoroso. Sinembargo, e por sirbi bo tambe pa rechasa trabou, pa rechasa un amistad of cualke otro situacion cu bo ta considera.

1. Acept'e

Cura e herida di rechaso ta cuminsa cu aceptacion

Aunke e por bira un tiki tristo, pensa y acepta cu rechaso ta real ta e prome paso pa cura.

Si, e prome paso pa cura e herida di rechaso ta pa acept'e. Esaki ta hopi mas facil pa skirbi cu pa haci, ya cu e ta un proceso bastante complica. Sinembargo, bo no por sali for di e waf si bo no acepta cu bo a wordo rechasa.

Entre otro, esaki ta pasa pa respeta e decision di e persona ey. Bo mester ta consciente cu ser humano ta liber pa acepta of rechasa otro su proposicionnan, di manera cu bo no por haci nada pa obliga nan scochi loke bo ke. Acepta e rechaso ta acepta e principio aki, cu naturalmente ta implica un ehercicio di humildad.

Tambe ta traduci den tuma distancia, cuminsa ehecuta e prome pasonan pa cera e ciclo, sa cu bo ambicionnan actual lo no materialisa y evita culpa e persona. Acepta cu bo a wordo rechasa ta nifica cu bo ta realisa e realidad, un realidad cu bo tin dilanti di bo.

Si bo ta kere cu e realidad aki no ta existi, of cu bo por haci algu pa cambie na bo manera, anto lo bo cay mas y mas den e pos. Manera nos lo wak aki rato, esaki no ta nifica sconde bo sentimentonan of fingi cu e no a duel bo. Al contrario, e ta encera asimila cu un hende a expresa cu e no ta coresponde cu e amor cu bo ta profesa na dje di forma expresivo.

2. Brasa bo sentimentonan
Manera nos a bisa na principio, e cocktail di senti-

mento cu bo ta sinti awor ta completamente normal. Bo ta desaroya un of otro cu mas intensidad segun hopi variabel, maske bo ta sigur cu bo ta experiencia tur.

E dolor ta esun mas caracteristico, despues di cua ta sigui esun di tristesa y rabia. E ultimo cos cu bo mester haci ta reprimi e emocionnan aki, ya cu haci cu nan no ta existi no ta implica elimina nan. Al contrario, loke bo ta haci ta sconde nan pa nan surgi mas of menos laat for di bo. Nan lo haci esaki como frustracion y insatisfaccion cu un intensidad y repercusion hopi mas halto.


Naturalmente, acepta bo emocionnan no ta nifica cu nan ta controla bo. Si, e ta yora ora bo mester yora y sinti bo tristo ora e emocion aki invadi bo; pero e ta siña maneha nan tambe. Si no, tur bo dia lo ta condiciona pa nan y lo bo no haya un luga pa otro manera goso y speransa surgi.

3. Siña un les

Manera otro experiencianan di bida, cura e herida di rechaso ta haci door di haya un siñansa di dje. Naturalmente, bo no tin cu hacie den e prome dianan, pero despues di un par di siman bo mester evalua na un manera obhetivo kico bo por siña for di esaki.

Por ehempel, e strategia cu bo a uza durante e coqueteo no tabata e strategia corecto, cu bo tabata hopi directo of cu bo expectativanan tabata hopi halto. Sea manera ta, bo ta haci un ehercicio di reflexion pa bo haya sa cua ta e erornan cu bo a comete y con bo por mehora nan den futuro.

Naturalmente, bo por no haya nada pa rescata.



Manera nos a menciona caba, voluntad liber ta algu cu bo mester respeta; pasobra esun cu ta stima un hende no ta nifica cu bo amor ta ser contesta. Hasta esaki ta un gran les, un cu lo sirbi bo pa bo siguiente experiencianan amoroso.

4. Busca sosten den bo amigonan

Pa cura e herida di rechaso mester probecha di e amistadnan

E sernan keri ta pa duna sosten den e momentonan mas dificil di bida, incluyendo situacionnan di rechaso.

Bo amigo- y famianan por yuda hopi den e proceso aki, di manera cu nunca bo no ta laga nan un banda. Ta hopi comun cu nos ke enfrenta e experiencia aki so, y hasta isola nos mes for di otronan. E ta compronde cu bo amigo- y famianan ta pa apoya bo den e sorto di momentonan aki.

Nan no solamente por ofrece bo un schouder pa sostene bo mes riba dje, pero nan por yuda bo balora cosnan den perspectiva y duna bo consejo util. Tambe, nan por sirbi bo como un distraccion pa bo no pensa riba dje atrobe y atrobe. No duda den haci actividadnan pa bo cuminsa recupera i cura e herida di rechaso.

5. Corda ken bo ta y kico bo ta capaz di haci

Manera investigadonan ta indica, autoestima abou ta un di e contestanan clasico na rechaso. Aunke bo ta un persona cu un confiansa solido, ta inevitabel cu e ta wordo afecta un tiki despues di un episodio di e tipo

aki.

Pues, pa cura e herida di rechaso bo mester corda ken bo ta y kico bo ta capaz di haci. No laga e experiencia aki resulta den un mal opinion pa bo, un cu por stroba bo den bo siguiente biahenan amoroso. Tin hopi manera pa recupera bo autoestima, di manera cu aki nos ta laga bo algun idea.

6. Sigui dilanti

Cu esaki nos ta referi na no tuma un paso atras i isola bo mes for di tur loke ta rondona bo. Bida ta sigui, y e lo hacie semper riba e margen di tur rechaso. Mantene un compromiso cu bo trabou, interactua cu bo famia, amigonan y colega, dedica tempo pa bo habitonan, haci deporte y crea espacio di distraccion ta solamente un forma pa sigui.

Sin duda por ta algo dificil den e prome dianan, ya cu bo lo recorda continuamente cu bo a wordo rechasa. Precisamente sigui cu bo bida lo permiti bo reduci e momentonan cu bo mente ta blanco, y lo recorda bo tambe cu tin hopi cos den dje cu bo ta balora.

7. No laga esaki condiciona bo siguiente experiencianan
Finalmente, un manera pa bo recupera di un rechaso amoroso ta pa no laga e condiciona bo experiencianan cu ta bini. cu esaki nos no ke stimula bo mesora pa cuminsa sali cu un otro hende; solamente pa bo no cera bo mes completamente na e idea aki despues cu bo ta sinti bo prepara.

POLISNAN DI FRONTERA A DETENE UN HOMBER NA AIRPORT

Diaranson atardi a sosode un detencion na airport. E vehiculo di transporte policial mester a bay airport pa asina busca e detenido y hib'e na un warda di polis. Nos a puntra vocero policial pero te na e momentonan aki nos no a haya ningun informacion oficial ainda pa cu e motibo di e detencion.



Polis a detene un chauffeur pa core cu droga den auto den Santa Cruz



Diasabra anochi durante patruya polisnan atento di distrito 4 (Santa Cruz) a para un auto pa un control na altura di Veld di Estrella na Papilon, durante e control a bin descubri cu e chauffeur tabata tin droga den su poder y a detene. A detene e sospechoso pa viola e ley di droga. Polis a confisca e droga y a solicita e vehiculo di transporte pa hib'e na warda di polis.



8								
		3	6					
	7			9		2		
	5				7			
				4	5	7		
			1				3	
		1					6	8
		8	5				1	
	9					4		

		8		3		5	4	
3			4		7	9		
4	1				8			2
	4	3	5		2		6	
5								8
	6		3		9	4	1	
1			8				2	7
		5	6		3			4
	2	9		7		8		

Clasificados

SOLODIPUEBLO@GMAIL.COM
CEL. 585 9500

Polis a haya 4 hoben graduado ta chill na "pyjama" bisti banda di school



Diabierna madrugá durante patrulla polis ta bin topa cu un auto sospechoso banda di un school na Morgenster, mesora nan a para pa control'e. Durante e con-

trol polis a bin haya algun 4 hoben na cu "pyjama" bisti nan ta bisa cu nan tabata chill. Polis a busca den e auto y a haya algun cos ilícito y a confisca esakinan.

Un momento bunita y special: CasMarie a keda inaugura na Mama Ties Santa Cruz

Dos estimado mama cu nos semper lo recorda tabata e centro y curason di un evento cu a tuma lugar diaranson anochi na Santa Cruz, Marie & Ties, ambos no ta cu nos mas pero nan ta ketobay sigui inspira nos semper den loke ta servicio na comunidad.

Un gran cantidad di hende a bini hunto pa loke tabata e ceremonia y apertura di CasMarie na Mama Ties, na unda cu un hogar familiar a keda transforma den un facilidad diseñá pa sostene esnan cu ta sufri di demencia. E discursonan di dedicacion pa medio di miembronan di famia Fito Croes y Yvonne Escalona, como tambe e testimonionan audio visual conmovedor a yena tur hende nan wowo cu lagrima di gratitud p'e hende muhenan cu a move generacionnan pa haci bon den comunidad.

Mama Ties, famia di Croes-Lee a lanta un network di yiunan empresario y persistente cu a extende nan

miembronan di famia, sostene nan cu hopi amor y inclusion incondicional, siñandonan respet y responsabilidad mutuo. Durante e añanan, e famia a enfrenta varios dificultadnan y momentonan difícil culminando na 2022 cu perdida di un ser keri, Mayrin, sigur un soldat den e lucha contra cancer.

Mama Ties a lanta e muchanan hopi consciente socialmente sigurando cu nan primiti di semper duna bek na comunidad pa medio di gratitud y humildad pa nan oportunidadnan. Riba 22 di december 2022, e rumannan a lansa Mama Ties Foundation dedica na expande y engrandece cuido di salud mental na Aruba. Mayrin a hunga un rol crucial den establece e fundacion mientras cu Fito a traha incansablemente pa transforma e hogar di nan estimado mama den un centro di cuido pa adultonan mayor, asina honrando e di e forma aki. Mama

Ties Foundation a completamente encarga su mes den financia e renobacion y brinda e facilidad na CasMarie.

CasMarie na Mama Ties tabata prepara pa yama bon bini na 14 individuo pa interaccionnan diario. Cu sosten di Minister di Asuntunan di Adulto Msyor, e iniciativa aki ta promove e concepto di Pasa Dia pa brinda alivio na famianan y cuido na adultonan mayor sufriendo di perdida di memoria of otro limitacionnan cognitivo. CasMarie tabata e socio perfecto pa e iniciativa aki. E colaboracion entre dos fundacion lo yuda comunidad enormemente. E dos organisacionnan non-profit tin un historia similar.

Marie, e estimado casa di Boy Escalona a cuminsa sufrir di Alzheimer den su edad di 50 bay ariba. Su casa a dicidi pa no laga e amor di su bida atras anto a pesar cu no tabata tin mucho conocimiento ainda



riba e enfermedad e tempo ey, el a apoya Marie cu hopi amor y dedicacion te na momento di su morto. Despues cu el a fayece, Boy a cuminsa dedica su bida na yuda otro nan, guiando miembronan di famia cu ta pasa den situacionnan similar. Su esfuersonan, den colaboracion cu e yiu muhenan awor adultonan, Yvonne, Dyane y Gisele, a resulta den e apertura di CasMarie, casi dos decada despues, na Savaneta.

CasMarie ta invita esnan cu ta sufri di demencia pa bin haci ehersicio, socialisa, y pasa tempo cu otro durante e dia mientras cu nan famia ta na trabao. Nan ta curasha pa haci loke ta trece nan alegria, cushina, arte, ehersicio, baila, puzzle, anto interaccion cu un staff cu

hopi bon training, alegre y cu un curason hopi grandi. Segun Minister Ursell Arends, su ministerio ta planea pa sostene mas facilidatnan similar den otro barionan rond di e isla pa medio di e necesidad grandi cu tin.

Esnan cu ta sufri di demencia ta rekeri cuido constantemente, anto cu e Pasa Dias obtenibel, yiunan por confia cu nan mayornan of otro miembronan grandi di nan famia por ta sigur den un organizacion responsabel. Esaki ta permiti nan pa por sigui nan dia, disfrutando di un alivio di constantemente mester ta preocupa riba nan ser keri. CasMarie na Mama Ties ta un iniciativa importante anto ta grandemente aprecia pa nos comunidad.

E BON NOTICIA

IGLESIA UNIVERSAL DI DIOS TATA, PA SALBACION DI HUMANIDAD

Den Bijbel Exodo 24: 7 – 8, Testamento Bieuw nos por lesa, cu Dios Tata a sera e prome Aliansa cu e pueblo di Israel, pa medio di Moises. Den Bijbel 2 Samuel 7: 16, nos por lesa, cu Dios Tata e eligi David, e prome Rey di Israel. Dios Tata a priminti cu su yiunan, su sucesornan, nan lo ta pa semper encabesa e Reino di Dios. Pero awor e promesa aki a wordo verifica den Cristo Hesus, den e Aliansa Nobo di Dios Tata. E Aliansa Nobo, Bijbel Mateo 26: 26-28: “Mientras nan tabata come, Hesus a tuma e pan, E’l a gradici Dios, a kibra e pan y a duna Su discipelnan. Tuma come, esaki ta Mi Curpa. Despues E’l a tuma e copa di binja, a yama Dios danki pa e copa y a pas’e pa nan, bisando: Boso tur bebe for di dje. Esaki ta Mi Sanger, e Sanger cu ta confirma e Aliansa cu Mi ta derama pa hopi hende, pa pordon di pikanan.” Pa medio di e sacrificio y morto di Cristo-Hesus na crus, Dios Tata a sera un Aliansa Nobo cu e pueblo di Israel, manera cu den Bijbel Lucas 1: 32 – 33 ta bisa: “Senyor Dios lo dun’E e Trono di Su antepasado David, te den eternidad lo E ta Rey di e decedientenan di Jacob y Su Reino lo no tin fin.” E Aliansa Nobo aki di Dios Tata, ta e pueblo nobo di Israel pa medio di Cristo-Hesus Su unico Iglesia Universal pa medio di Su Apostelnan. Den e prome Aliansa, e hudiunan tabata encabesa e Reino di Dios Tata y Moises tabata e Vicario di Dios Tata. Pero awor Cristo-Hesus escohe Pedro y a entregel’e e yabinan di Reino di Cielo. Den Bijbel Mateo 16: 15 – 19: “E ora ey Hesus a puntranan: Anto boso mes, ken boso mes ta bisa Mi ta? Simon a contesta: Bo ta E Mesias, e Yiu di Dios bibo! Hesus a bis’e: Felis bo ta Simon yiu di Huan, pasobra no ta hende a revela bo esaki, ma Mi Tata cu ta den Cielo. Mi ta bisa bo: Abo ta Pedro, (o sea baranca) y riba es baranca aki lo Mi lanta Mi Iglesia y forsan di fierno lo no podera di dje. Lo Mi duna bo e yabinan di Reino di Cielo y loke bo prohibi na tera, lo ta prohibi den Cielo tambe, loke bo permiti na tera, lo ta permiti den Cielo tambe.” Cristo-Hesus ta bisa bon cla, Mi Iglesia, o sea un solo Iglesia Universal y no iglesianan. Cristo-Hesus ta bisa, cu e demonionan di fierno, no por kibra y ni vence e Unico Iglesia aki. E number di Pedro tabata Simon, pero Hesus a duna Simon e number di Pedro, cu ta significa Baranca y riba es Baranca aki, lo Mi lanta Mi Iglesia. Cristo-Hesus a bisa San Pedro: “Loke bo prohibi na tera, lo ta prohibi den Cielo tambe, loke bo permiti na tera, lo ta permiti den Cielo tambe.” Esaki ta e Ley-

nan Canonico di Iglesia. Hesus a bisa Su Apostelnan, Su prome Obisponan Bijbel Mateo 28: 20: “Lo Mi ta cu bosonan tur dia, te na cabamento di mundo.” Cristo-Hesus a entrega Pedro e yabinan di Reino di Cielo y esaki ta significa, cu e Iglesia Universal di Cristo Hesus, ta e unico porta y caminda pa e almanan por drenta den e Reino di Cielo. Cristo-Hesus a establece den Su Iglesia, e 7 Sacramentonan obligatorio di Dios Spirito Santo pa salbacion di humanidad segun Bijbel. Sacramento di Bautismo, Mateo 28: 19-20. Sacramento di Confirmacion, Echonan di Apostelnan 2: 1-4. Sacramento di Confesion, Huan 20: 23. Sacramento di Eucaristia, Lucas 22: 19-20. Sacramento di Matrimonio, Mateo 19: 4-6. Sacramento di Orden Sacerdotal, Marco 3: 13-15. Sacramento di Enfermonan, Hacobo 5: 14-15. E Iglesia Universal, tin mas di 2000 anja di existencia y tabata tin 265 Papanan (Vicarionan), desde San Pedro te na e Papa actual. Sinembargo na anja 1521, Martin Luther, un ex-sacerdote excomulga, a inventa e theoria di e interpretacion di Bijbel liber. E interpretacion liber aki, a produci como 36.000 diferente sectanan durante siglonan. Durante tempo hopi di nan a lanta nan mesun iglesianan y predicando e Bijbel na nan manera y buscando discipelnan debil den fe. Carta di San Pablo na su coleganan Obispo, Bijbel Echonan di Apostelnan 20: 28-30 : “Cuida boso y di henter e rebanjo na cual Spirito Santo a pone boso como Obisponan pa warda e Iglesia di Senyor, na cual E’l a gana cu Su propio Sanger. Mi sabi cu despues di Mi partida, lo drenta lobonan feroz cu lo no tene compasion cu e rebanjonan y cu denter di boso mes lo surgi hendenan cu lo sinja doctrinanan robes y nan lo gana discipelnan nan tras.” Bijbel Marco 16: 15 -16 : “Hesus ta bisa Su Apostelnan: Sali pasa na henter mundo y predica e Evangelio pa henter humanidad. Esun cu kere y ta bautisa lo ta salba, ma esun cu no ta kere, lo ta condena.” E palabra aki, pasa y predica na henter mundo ta significa, Iglesia Universal. Pesey esnan den sectanan y hudiunan, nan mester kere den Cristo-Hesus y nan mester bautisa den e Unico Iglesia Universal di Cristo-Hesus pa nan por ta salba y pa nan por drenta den e Reino di Cielo. Den e Evangelio ta bisa, esnan cu no ta kere y cu no ta bautisa, nan lo ta condena. Esnan den Iglesia Universal di Cristo-Hesus, nan ta e pueblo Nobo di Israel di Dios Tata.

Seferino Tromp



OLIVE TREE'S
PRE-PAID
FUNERAL PLAN
PAY AS YOU CAN

Piedraplat ☎ 582 0000
Sanicolaas ☎ 584 8888 | 5820000
Habri dialuna pa diabierna | 8:00am-4:00pm
Olive Tree Social Department ☎ (+297) 743 7411
www.olivetreefuneralhome.com

ORACION DI DIA



Un dia fructifero carga cu gracia y bendicion di Dios.

E ora ey El a bisa su discipelnan: "Cosecha ta grandi, ma trahado ta poco". Mateo 9, 37.
Kico Hesus kier bisa cu esey? E cosecha ta e multitud di pueblonan rond mundo y poco trahadonan ta e escasez di maestronan pa siña nan e Palabra di Dios.

Anos lo ta dispuesto pa yuda un otro den nan sufrimento y debilidatnan? Ta e misericordia di Dios den nos curason lo impulsa nos pa dal e prome stap cu balentia pa yuda e ruman p'e por sana su heridanan.

Señor ta doño di e cosecha y nos tur cu ta lesa e Palabra di Dios, anos cu ta bay tur diadomingo pa scucha su Palabra, anos ta e prome yamanan pa sali y bay conta na cas, den nos famia, na nos trabou y na tur caminda cu nos tin un Dios bibo, cu ta cu nos pa medio di su Spirito Santo cu ta duna nos e balentia y curashi. Nos fe y confiansa den Dios cu lo resalta den nos testimonio di bida, cu si

El a lanta mi di mi enfermedad, di mi esclavitud y di mi depresion, E por haci'e pa bo tambe. Tuma e decision y busca e doño di cosecha pa E por yuda bo bira un bon trahado den su cunucu.

Oracion : Señor, haci mi un bon obrero den bo cunucu y semper refleha e amor di Cristo.
Amen.